



basic education

Department:
Basic Education
REPUBLIC OF SOUTH AFRICA

SENIORSERTIFIKAAT-EKSAMEN/ NASIONALE SENIORSERTIFIKAAT-EKSAMEN

AFRIKAANS TWEEDE ADDISIONELE TAAL V2

MEI/JUNIE 2025

VRYSTAAT

PUNTE: 40

TYD: 1½ uur

Hierdie vraestel bestaan uit 17 bladsye.

INSTRUKSIES EN INLIGTING

1. MOENIE probeer om die hele vraestel te lees nie. Raadpleeg die INHOUDSOPGAWAWE op die volgende bladsy en merk die vraagnommer oor die teks wat jy hierdie jaar bestudeer het. Lees hierdie vraag aandagtig deur voor jy dit beantwoord.

2. Hierdie vraestel bestaan uit TWEE afdelings:

AFDELING A: Drama (40)

AFDELING B: Kortverhale (40)

3. Beantwoord die vrae in EEN van die afdelings:

AFDELING A: DRAMA

Beantwoord die vrae oor die drama (*Perdekrag*) wat jy bestudeer het.

OF

AFDELING B: KORTVERHALE

Beantwoord die vrae oor AL TWEE kortverhale wat jy bestudeer het.

4. Volg die instruksies aan die begin van elke afdeling noukeurig.
5. Nommer die antwoorde korrek volgens die nommeringstelsel wat in hierdie vraestel gebruik is.
6. Laat 'n reël oop ná elke antwoord.
7. Voorgestelde tydsindeling:

AFDELING A: 90 minute

OF

AFDELING B: 90 minute

8. Skryf netjies en leesbaar....

INHOUDSOPGAWE

Kies SLEGS die afdeling wat jy bestudeer het.

AFDELING A: DRAMA		
Beantwoord slegs die EEN vraag.		
VRAAGNOMMER	PUNTE	BLADSYNOMMER
1. <i>Perdekrag</i>	40	4
OF		
AFDELING B: KORTVERHALE		
Beantwoord AL TWEE kortverhale.		
2. "Rooikoos Willemse is seek"	20	8
EN		
" 'n Man kom tuis"	20	10
OF		
Beantwoord AL TWEE kortverhale.		
3. "Opgang"	20	13
EN		
"Die geheim"	20	15

AFDELING A: DRAMA

Hierdie afdeling bestaan uit EEN vraag.

VRAAG 1: PERDEKRAG – Cecilia du Toit

Lees die uittreksel hieronder en beantwoord die vrae.

TEKS A

LUCKY:	Nog nege-en-negentig uur in hierdie goor plek. (<i>Hy voel-voel na sy selfoon en onthou dat dit gekonfiskeer is.</i>) Ag flippen hel, die heks het my selfoon. (<i>Hy sug en begin weer hark, Binki kom links op.</i>)	
BINKI:	Wilma het my gestuur. Sy sê ek moet jou roep om te kom kyk hoe die beginners leer perdry.	5
LUCKY:	(<i>Gee 'n woedende kreet.</i>) Flippit! Ek moet gaan kyk en "oe" en "aa" en "ag hoe cute" as die spul om en om en om ry. Jy gaan sê vir haar ek stoot eerder die jy-weet-wat hier rond as om daar te gaan cheer.	
BINKI:	(<i>Onseker.</i>) E ... wat moet ek nou vir Wilma sê?	10
LUCKY:	Net wat jy wil. Sê vir haar ek laaik my job hier so vreeslik, ek kan my nie daarvan wegskeur nie. Ek laaik dit te veel om perdeuitskeidings rond te stoot. So dankie, maar nee dankie. (<i>Binki aarsel. Lucky grynslag spottend.</i>)	

1.1 "Nog nege-en-negentig uur in hierdie goor **plek**." (Reël 1)

"Ag flippen hel, **die heks** het my selfoon." (Reël 3)

- 1.1.1 Van watter plek praat Lucky? (1)
- 1.1.2 Waarom moet hy nog nege-en-negentig uur by hierdie plek bly? (1)
- 1.1.3 Wie is die "heks" van wie Lucky praat? (1)
- 1.1.4 Waarom het die heks Lucky se selfoon gevat? (1)

1.2 Kies die KORREKTE antwoord uit dié tussen hakies. Skryf net die vraagnommers (1.2.1 en 1.2.2) en die antwoord neer.

Lucky sê die plek is goor, want hy (1.2.1) (wil nie daar wees nie/hou van die plek). As hy later vir Binki sê hy "laaik" sy werk by die plek, (1.2.2) (spot hy net/praat hy die waarheid). (2)

1.3 Skryf die volgende sin oor en verander die onderstreepte deel om die stelling WAAR te maak.

Lucky het gedink die mense wat by Wilma kom perdry, is arm mense; daarom was hy so kwaad. (1)

- 1.4 Kies die KORREKTE antwoord. Skryf net die vraagnommer (1.4) en die letter (A–D) neer.

"*Binki aarsel*." (Reël 14) Dit sê vir ons dat Binki ... was om vir Wilma te gaan sê wat Lucky gesê het.

- A skaam
- B haastig
- C skrikkerig
- D opgewonde

(1)

- 1.5 Skryf die volgende gebeure onder mekaar oor in die korrekte VOLGORDE soos wat dit in die drama gebeur.

- Lucky het by Wilma begin werk.
- Lucky het klein katjies doodgemaak.
- Lucky het by die hek vir sy prokureur gewag.
- Lucky het vir Lady Jane se runnik geskrik en weggehardloop.

(4)

- 1.6 Die karakters se woorde sê vir ons hoe die karakters voel.

Kies die emosie uit KOLOM B wat by die karakter se woorde in KOLOM A pas. Skryf net die vraagnommers (1.6.1 tot 1.6.4) en die letter (A–E) neer.

KOLOM A		KOLOM B	
1.6.1	"Ek wil net gou 'n paar SMS'e stuur."	A	Lucky het gedink dis verkeerd van Binki om haar ma op haar naam te noem.
1.6.2	"Moet ek aangaan, of kry jy die prentjie in jou klipkop?"	B	Lucky was bang vir Kaizer.
1.6.3	"En ek verander Sabrina na Ma."	C	Wilma was kwaad vir Lucky omdat hy homself jammer kry.
1.6.4	"Jy's arm, siestog. So jy mag maar diere mishandel."	D	Lucky wou nie doen wat Wilma vir hom sê om te doen nie.
		E	Wilma wou hê Lucky moes verstaan dat hy die verkeerde idee het van die mense wat by haar kom perdry.

(4 x 1)

(4)

- 1.7 Waarom was dit 'n goeie idee dat Lucky die stalle moes skoonmaak?

(1)

- 1.8 Waarom was dit verkeerd van Lucky om nie te gaan kyk hoe die ander mense leer perdry nie?

(1)

- 1.9 Waarom voel jy jammer vir Binki in hierdie situasie?

(1)

- 1.10 Watter les oor stereotipering leer jy hier?

(1)

Lees die uittreksel hieronder en beantwoord die vrae.

TEKS B

WILMA:	Goed, volgende keer. <i>(Sy gooi die leiband om Lady Jane se kop en gee dit vir Binki. Binki vat dit versigtig en lei Lady Jane links af.)</i> Mooi, Binki. Jy doen dit sommer maklik vandag. <i>(Sy draai kwaai na Lucky.)</i> En nou spring jy aan die werk.	
LUCKY:	Ek hark natuurlik weer die bleddie jy-weet-wat uit die stalle.	5
WILMA:	Jy weet ook nou hoe.	
LUCKY:	Moet ek dit nou elke keer doen?	
WILMA:	Iemand moet dit doen.	
LUCKY:	<i>(Begin om Lady Jane se stal uit te hark.)</i> Die lewe is nie fair nie.	
WILMA:	Nee, dit is nie. Maar jy maak jou eie probleme.	10
LUCKY:	Kyk net hoe stir ek die shit, hoe meng ek die mis.	
WILMA:	Jy is nogal 'n goeie miskruier.	
LUCKY:	Wat nogal maak 'n miskruier goed?	
WILMA:	Jy weet tog wat hulle doen?	
LUCKY:	Byt my as ek weet.	15
WILMA:	'n Miskruier vat 'n hele lot mis, en dan maak hy bolletjies daarvan, en dan rol hy dit net waar hy dit wil hê.	

- 1.11 VOLTOOI die volgende sin deur 'n woord(e) in die lys hieronder te gebruik. Skryf net die vraagnommer (1.11) en die antwoord neer.

personifikasie;	'n vergelyking;	'n metafoor
-----------------	-----------------	-------------

"Jy is nogal **'n goeie miskruier**" in reël 12 is 'n voorbeeld van ... (1)

- 1.12 Kies die KORREKTE antwoord uit dié tussen hakies. Skryf net die vraagnommers (1.12.1 en 1.12.2) en die antwoord neer.

Die toon in hierdie uittreksel is meer (1.12.1) (positief/negatief) as aan die begin van die drama. Lucky (1.12.2) (was nie meer so stout nie/het steeds nie gedoen wat Wilma vir hom gesê het nie). (2)

- 1.13 Kies die KORREKTE antwoord. Skryf net die vraagnommer (1.13) en die letter (A–D) neer.

In reël 15 sê Lucky: "**Byt my as ek weet.**" Hiermee bedoel hy dat ...

- A Wilma kwaai is met hom.
- B hy bang is vir miskruiers.
- C hy presies weet waarvan Wilma praat.
- D hy glad nie weet waarvan Wilma praat nie. (1)

- 1.14 Waarom wou Lucky nie vir Wilma op haar naam noem nie? (1)

- 1.15 VOLTOOI die volgende sinne. Skryf net die vraagnommers (1.15.1 tot 1.15.4) en die antwoord neer.
- 1.15.1 Wilma het vir Lucky vertel hoe dit gebeur het dat die veearts haar perd, ... (die perd se naam), moes skiet. (1)
- 1.15.2 Omdat Wilma die aand by die partytjie te veel ... het, het Lucky haar 'n ou dronkie genoem. (1)
- 1.15.3 Lucky het vir Binki gesê dat sy nie aan hom sal ... as sy weet watter lelike dinge hy gedoen het nie. (1)
- 1.15.4 Lucky het katjies doodgemaak, maar Binki het haar ... uit die brandende huis probeer red. (1)
- 1.16 Lucky het die ryk mense se katjies doodgemaak omdat hulle lelik met sy ma gepraat het.
- Gee 'n feit uit die verhaal om te motiveer waarom die stelling ONWAAR is. (1)
- 1.17 Lucky het 'n paar lesse op die perdeplaas geleer.
- Kies die inligting uit KOLOM B wat by die gebeure in KOLOM A pas. Skryf net die vraagnommers (1.17.1 tot 1.17.4) en die letter (A–E) neer.

KOLOM A		KOLOM B	
1.17.1	Die magistraat het gesê dat Lucky geweet het wat hy doen toe hy die katjies doodgemaak het.	A	Kaizer het nie toegelaat dat Lucky hom slaan nie.
1.17.2	Lucky wou sy woede op Kaizer uithaal.	B	Wilma was verbaas toe Lucky sê hy het vir Kaizer water gegee.
1.17.3	Lucky het vir Kaizer van die katjies vertel.	C	Lucky moes gemeenskapsdiens by die perdeplaas doen.
1.17.4	Lucky het geskrik toe hy die letsels op Binki se arms sien.	D	Lucky het besef dat ander mense ook seerkry.
		E	Kaizer het vir Lucky gewys dat hy verstaan en hom vergewe.

(4 x 1) (4)

- 1.18 Noem TWEE dinge wat Binki aan die einde van die drama oor haar ma besluit het. (2)
- 1.19 Waarom was Lucky gelukkig om 'n ma soos sý ma te hê? (1)
- 1.20 Waarom was Binki aan die begin van die drama skaam vir ander mense? (1)
- 1.21 Hoe help die skrywer jou om te verstaan dat Lucky nie gewoond was aan die dinge wat hy op die perdeplaas moes doen nie? (1)
- 1.22 Waarom kan ons sê dat die slot goed by die drama pas? (1)

TOTAAL AFDELING A: 40

AFDELING B: KORTVERHALE

Hierdie afdeling bestaan uit TWEE vrae.

VRAAG 2: KINDERS VAN DIE AARDE – Charles Fryer

Beantwoord die vrae oor AL TWEE verhale.

VERHAAL A: "ROOIKOOS WILLEMSE IS SOEK" – Abraham H de Vries
EN

VERHAAL B: " 'N MAN KOM TUIS" – Chris Barnard

VERHAAL A: "ROOIKOOS WILLEMSE IS SOEK" – Abraham H de Vries

Lees die uittreksel hieronder en beantwoord die vrae.

TEKS C

Dit was vir Rooikoos se hart te veel en hy moes eers klaar huil oor daar darem iémand is wat hom ken ...

"Jan, jy moet nou mooi luister," sê hy ná 'n rukkie. "Gaan na Rooikoos Willemse se kamer toe, nommer elf, en dan kyk jy of hy daar is ..."

"Ja, meneer ..."

5

Weg is die man, om te gaan kyk.

En Rooikoos staan met die gehoorbuis in sy hand en die trane loop oor sy wange omdat daar niemand, niemand meer is om mee te praat nie, noudat hy praat só nodig het.

Hy sê vir die dooie gehoorbuis in sy hand, hy sê – so sag – sê hy: "En as ou Rooikoos Willemse daar is, Jan, as ... dan ... dan mag die liewe Here alleen weet wie ek is."

10

2.1 Skryf die volgende gebeure onder mekaar oor in die korrekte VOLGORDE soos wat dit in die verhaal gebeur.

- Die uitslag van die rugbywedstryd was gelykop.
- Rooikoos het op Barrydale se losskakel gekree.
- Rooikoos het vroeg die Saterdagoggend al in die kantien gaan drink.
- Die hotelbestuurder het gekeer dat Rooikoos en die Barrydalers baklei.

(4)

2.2 Kies die KORREKTE antwoord uit dié tussen hakies. Skryf net die vraagnommers (2.2.1 en 2.2.2) en die antwoord neer.

Die mense op Rooikoos se dorp was so (2.2.1) (tevrede/ontevrede) oor die uitslag van die rugbywedstryd dat hulle vir Rooikoos baie drankies gekoop het. Die Barrydalers was so (2.2.2) (gelukkig/kwaad) oor die uitslag, dat hulle Rooikoos gestraf het.

(2)

2.3 "Gaan na Rooikoos Willemse se kamer toe, nommer elf, en dan kyk jy of hy daar is ..." (Reël 3 en 4)

2.3.1 Wie praat hier? (1)

2.3.2 Op watter dorp is hy? (1)

2.3.3 Waarom het hy in die hotel op hierdie dorp wakker geword? (1)

2.3.4 Wat het die Barrydalers met Rooikoos se baard gedoen om hom te straf? (1)

2.4 Kies die KORREKTE antwoord. Skryf net die vraagnommer (2.4) en die letter (A–D) neer.

"Dit was **vir Rooikoos se hart te veel** ..." in reël 1 beteken dat Rooikoos ...

- A siek gevoel het.
- B baie kwaad was.
- C te hartseer was om te praat.
- D met niemand meer wou praat nie. (1)

2.5 Skryf die volgende sin oor en verander die onderstreepte deel om die stelling WAAR te maak.

Die Barrydalers het Rooikoos se rooi hare wit gekleur. (1)

2.6 Die karakters se woorde sê vir ons hoe die karakters voel.

Kies die emosie uit KOLOM B wat by die karakter se woorde in KOLOM A pas. Skryf net die vraagnommers (2.6.1 tot 2.6.4) en die letter (A–E) neer.

KOLOM A		KOLOM B	
2.6.1	"Ai ... ai ... Sy pa se plaas en sy stukkie grond ... is als deur sy keel ..."	A	Die skoonmaker in die hotel het mooi met Rooikoos gepraat.
2.6.2	"Wanneer het jy dan hier begin werk?"	B	Rooikoos was verbaas oor die vreemde man in sy kamer.
2.6.3	"Hier is meneer se koffie."	C	Die dorp se mense was jammer vir Rooikoos wat al sy grond verloor het omdat hy so baie drink.
2.6.4	"Ja, meneer. Ek ken hom, meneer."	D	Die kelner het net rustig aangegaan met sy werk.
		E	Rooikoos was baie deurmekaar toe hy die Sondagoggend wakker word.

(4 x 1) (4)

- 2.7 Waarom was dit verkeerd van Rooikoos om op die ander span se speler te skree? (1)
- 2.8 Waarom was dit reg van die Barrydalers om Rooikoos in 'n hotelkamer te laat slaap? (1)
- 2.9 Watter les oor negatiewe gevolge leer jy uit Rooikoos se situasie? (1)
- 2.10 Waarom kan ons sê dat die slot goed by die verhaal pas? (1)

EN

VERHAAL B: " 'N MAN KOM TUIS" – Chris Barnard

Lees die uittreksel hieronder en beantwoord die vrae.

TEKS D

... Kyk nou hierdie pad wat ons vandag ry. Ek het hom help maak. Vandag vat hy my na my vrou en kinders toe. En dis mos wat die Bybel sê – werp jou brood op die water en na baie dae ..."

Die nomadiese kampele bodder hom ook nie. "Ag, dis partykeer ongerieflik," gee hy teensinnig toe, "maar daar is baie voordele. Jy kry die wêreld gesien. O, jy ken die wêreld later soos die palm van jou hand. Noem maar 'n plek en ek was daar. Suidwes, Transvaal, die Vrystaat, Natal, die Kolonie. Nee, ek ken die wêreld. En saans as jy daar by die vuur sit en jy kyk na die sterre oor jou kop, dan het jy vrede in jou hart."

Dit word vir my duidelik, terwyl hy gesels: hierdie man sal jy nie maklik onderkry nie.

- 2.11 VOLTOOI die volgende sinne. Skryf net die vraagnommers (2.11.1 tot 2.11.4) en die antwoord neer.
- 2.11.1 Gouws wou 'n geleentheid tot op ... hê. (1)
- 2.11.2 Gouws het net 'n klein koffertjie, 'n paar los pakkies en 'n halwe sakkie ... by hom gehad. (1)
- 2.11.3 Gouws het sy familie net een keer in 'n ... vir 'n naweek gesien. (1)
- 2.11.4 Gouws sê die lewe as padmaker is soms moeilik, want daar is baie ... (1)
- 2.12 VOLTOOI die volgende sin deur 'n woord(e) in die lys hieronder te gebruik. Skryf net die vraagnommer (2.12) en die antwoord neer.

personifikasie;	'n vergelyking;	'n metafoor
-----------------	-----------------	-------------

"Vandag **vat hy** my na my vrou en kinders toe" in reël 1 en 2 is 'n voorbeeld van ... (1)

- 2.13 Kies die KORREKTE antwoord. Skryf net die vraagnommer (2.13) en die letter (A–D) neer.

"Die nomadiese kampelewe **bodder hom ook nie.**" (Reël 4) Dit sê vir ons dat Gouws ...

- A gereeld in 'n tent vakansie gehou het.
- B daarvan gehou het om op een plek te bly.
- C tevrede was om gereeld te trek om paaie te maak.
- D nie omgee het om so ver te reis om sy gesin te sien nie. (1)

- 2.14 Noem TWEE dinge wat Gouws gedoen het wat gewys het dat hy opgewonde was om by sy huis te kom. (2)

- 2.15 Gouws was al middeljarig (*middle-aged*). Waarom het hy nog klein kindertjies gehad? (1)

- 2.16 Gouws se lewe was eenvoudig, maar gelukkig.

Kies die inligting uit KOLOM B wat by die gebeure in KOLOM A pas. Skryf net die vraagnommers (2.16.1 tot 2.16.4) en die letter (A–E) neer.

KOLOM A		KOLOM B	
2.16.1	Gouws het gesê dat hy 'n lekker pad in slegs 'n maand kan bou.	A	Gouws het vertel dat sy seun, Petrus, 'n slimkop is.
2.16.2	Gouws was trots op sy gesin.	B	Gouws was trots op sy werk as padmaker.
2.16.3	Gouws het nie met leë hande huis toe gegaan nie.	C	Gouws het vir die verteller die pad na sy huis beduie.
2.16.4	Gouws, sy vrou en kinders het saam al sy bagasie opgetel.	D	Die gesin het nie gesien toe die verteller by hulle verbyry nie.
		E	Gouws het vir almal in die gesin 'n spesiale geskenk gebring.

(4 x 1) (4)

- 2.17 Die verteller het dadelik huis toe gery nadat hy vir Gouws afgelaai het.

Gee 'n feit uit die verhaal om te motiveer waarom die stelling ONWAAR is. (1)

- 2.18 Waarom was dit reg dat Gouws nie wou hê dat die verteller hom by sy huis aflaai nie? (1)

- 2.19 Waarom was dit verkeerd van die verteller om nie te glo wat Gouws vir hom van sy tuiskoms vertel het nie? (1)

- 2.20 Waarom kan jy respek hê vir 'n man soos Gouws? (1)
- 2.21 Kies die KORREKTE antwoord uit dié tussen hakies. Skryf net die
vraagnummers (2.21.1 en 2.21.2) en die antwoord neer.
- Aan die einde van die verhaal is die toon (2.21.1) (vroluk/hartseer), want almal
was (2.21.2) (bly dat Gouws by die huis is/kwaad oor die bagasie wat in die
straat gelê het). (2)
- 2.22 Hoe beklemtoon die skrywer die tema van liefde in die verhaal? (1)
- [40]

OF

VRAAG 3: OM LAASTE TE KAN LAG – Pirow Bekker

Beantwoord die vrae oor AL TWEE verhale.

VERHAAL A: "OPGANG" – Ina Rossouw

EN

VERHAAL B: "DIE GEHEIM" – J van Melle

VERHAAL A: "OPGANG" – Ina Rossouw

Lees die uittreksel hieronder en beantwoord die vrae.

TEKS E

"Wie s'n is dit, Lukas?" het sy gevra, haar swart ogies smal van nuuskierigheid in haar maer gesig.	
Toe het hy gelag, byna so lekker soos die aand by oom Lemmer-hulle toe hulle mekaar die eerste keer ontmoet het en hy asyn in haar koffie gegooi het.	
"Dis joune," het hy gegiggel.	5
"Myne, Lukas?"	
"Ja, mens. Verbrands. Dis mos wat ek sê. Jy weet ek wou nog altydmaartjies vir jou ene koop."	
"Maar Lukas –"	
"Ek het 'n jaar om te betaal. Hy kan 'n hele spul goed aanvang wat die masjiene in die ou dae nie kon aanvang nie. Jy moet ophou om bedees te wees teenoor die ander vroumense. Dis nou nie meer nodig nie."	10
Hy het die deksel versigtig afgehaal en die armpie vasgehaak.	
Daar het dit toe op die kombuistafel gestaan, 'n sierlike metaalding met gekrulde letters en kringelingetjies daarop geverwe.	15

3.1 "Wie s'n is dit, Lukas?" (Reël 1)

3.1.1 Wie praat hier? (1)

3.1.2 Waar het Lukas die naaimasjien gaan sit nadat almal daarna gekyk het? (1)

3.1.3 Waarom mag die kinders nie aan die naaimasjien gevat het nie? (1)

3.1.4 Wat het die kinders gedoen nadat hulle die naaimasjien gesien het? (1)

3.2 Skryf die volgende sin oor en verander die onderstreepte deel om die stelling WAAR te maak.

Lot was altyd bang dat Hanneltjie haar masjien se deksel sou breek. (1)

- 3.3 Kies die KORREKTE antwoord uit dié tussen hakies. Skryf net die vraagnommers (3.3.1 en 3.3.2) en die antwoord neer.

Toe Hanneltjie nie haar eie masjien gehad het nie, het Lot gedink dat sy (3.3.1) (harder gewerk het/beter was) as Hanneltjie. Noudat Hanneltjie haar eie masjien gekry het, het sy (3.3.2) (haar nie meer aan Lot gesteur nie/Lot op haar plek gesit).

(2)

- 3.4 Kies die KORREKTE antwoord. Skryf net die vraagnommer (3.4) en die letter (A–D) neer.

As Lukas vir Hanneltjie sê om op te hou om so "**bedees**" te wees (reël 11), beteken dit dat Hanneltjie ...

- A goeie maniere moet hê.
- B die nuwe masjien moet geniet.
- C nie meer moet voel ander is beter as sy nie.
- D nie meer vir Lot hoef te vra om haar masjien te gebruik nie.

(1)

- 3.5 Die karakters se woorde sê vir ons hoe die karakters voel.

Kies die emosie uit KOLOM B wat by die karakter se woorde in KOLOM A pas. Skryf net die vraagnommers (3.5.1 tot 3.5.4) en die letter (A–E) neer.

KOLOM A	KOLOM B
3.5.1 "Kyk, wat het ek hier!"	A Lot het nie gehou van mense wat sukkel nie.
3.5.2 " 'n Vrou sonder 'n masjien is 'n onding."	B Die buurvrouens was nuuskierig oor Hanneltjie se masjien.
3.5.3 "Dis nou wat ek 'n uitblinkermasjien noem."	C Lukas was baie gelukkig dat hy vir sy vrou 'n masjien kon koop.
3.5.4 "Dag, Charlotte ... Vee jou voete maar goed af."	D Hanneltjie was tevrede omdat sy vir Lot kon sê wat Lot altyd vir haar gesê het.
	E Drien was baie opgewonde oor Hanneltjie se nuwe naaimasjien.

(4 x 1)

(4)

- 3.6 Skryf die volgende gebeure onder mekaar oor in die korrekte VOLGORDE soos wat dit in die verhaal gebeur.

- Hanneltjie het Lot gewaarsku om versigtig met haar naaimasjien te werk.
- Meisie en Drien het na Hanneltjie se nuwe naaimasjien kom kyk.
- Hanneltjie se man het vir haar 'n nuwe naaimasjien gekoop.
- Lot wou voel hoe stik Hanneltjie se nuwe masjien.

(4)

- 3.7 Waarom was dit reg dat Lukas vir Hanneltjie haar eie masjien gekoop het? (1)
- 3.8 Waarom was dit verkeerd van Lot om so lelik met Hanneltjie te praat wanneer Hanneltjie Lot se masjien wou gebruik? (1)
- 3.9 Watter les het jy in die verhaal geleer oor hoe jy ander mense kan help? (1)
- 3.10 Waarom kan ons sê dat die slot goed by die verhaal pas? (1)

EN

VERHAAL B: "DIE GEHEIM" – J van Melle

Lees die uittreksel hieronder en beantwoord die vrae.

TEKS F

So het die gebeurtenis daar plaasgevind, amper so geheimsinnig asof niemand daarby teenwoordig was nie. Die een party het niks van die ander geweet nie en so het daar oor die gebeurtenis as't ware 'n deksel gelê wat dit aan die bekendheid onttrek het.

Dou het met niemand oor die gebeurtenis gepraat nie, nie met sy familie in 5 Schouwen nie en later ook nie by sy huis nie. Want hy het die gebeurtenis beskou as 'n besit wat hy, deur dit aan ander mee te deel, gedeeltelik sou verloor.

Dit was soos 'n geskenk van 'n Hoër Hand. Was dit nie heerlik om te dink dat jy 'n kind gered het met gevaar vir jou eie lewe nie? Hy het die dood van naby gesien en hy het nie bang geword nie. Hy het gedink: Liewers verdrink, maar haar los, wil ek nie. 10

- 3.11 VOLTOOI die volgende sinne. Skryf net die vraagnommers (3.11.1 tot 3.11.4) en die antwoord neer.
- 3.11.1 Die reis van ... na Kortjeen was sewe ure lank. (1)
- 3.11.2 'n Noord-Bewelandse vrou en haar ... kinders was saam op die boot. (1)
- 3.11.3 Die kinders was verveeld en het ... dinge gedoen. (1)
- 3.11.4 Dou Snoek het op 'n stoel gesit en ... toe hy die mense hoor uitroep. (1)
- 3.12 Waarheen was Dou Snoek op pad? (1)
- 3.13 Noem TWEE redes waarom dit vir Dou moeilik was om Leune te red. (2)

- 3.14 VOLTOOI die volgende sin deur 'n woord(e) in die lys hieronder te gebruik. Skryf net die vraagnommer (3.14) en die antwoord neer.

'n vergelyking;	klanknabootsing;	personifikasie
-----------------	------------------	----------------

"Dit was **soos 'n geskenk** van 'n Hoër Hand," (reël 8) is 'n voorbeeld van ... (1)

- 3.15 Kies die KORREKTE antwoord. Skryf net die vraagnommer (3.15) en die letter (A–D) neer.

"... so het daar oor die gebeurtenis **as't ware 'n deksel gelê** ..." (Reël 2 en 3). Dit beteken dat ...

- A min mense van die gebeurtenis geweet het.
- B baie mense van die gebeurtenis geweet het.
- C almal baie gou van die gebeurtenis vergeet het.
- D daar oor die gebeurtenis in die koerant geskryf is. (1)

- 3.16 Dou en Leune het mekaar op 'n wonderlike manier weer ontmoet.

Kies die inligting uit KOLOM B wat by die gebeure in KOLOM A pas. Skryf net die vraagnommers (3.16.1 tot 3.16.4) en die letter (A–E) neer.

KOLOM A		KOLOM B	
3.16.1	Toe Leune onder die water verdwyn, was Dou bang dat sy sou verdrink.	A	Leune het Dou by 'n sendingfees ontmoet en met hom getrou.
3.16.2	Hulle het gesukkel om Leune by te kry nadat sy byna verdrink het.	B	Leune se ma wou nie meer oor die insident praat nie.
3.16.3	Leune was in die geheim verlief op die seun wat haar gered het.	C	Dou het die boot verlaat sonder om met iemand te praat.
3.16.4	Leune het besef sy is volwasse en moes ophou droom oor die seun wat haar gered het.	D	Dou het besluit dat hy eerder sêlf sal verdrink as om die meisie te los.
		E	Leune het nie kêrels gehad tot sy twintig jaar oud was nie.

(4 x 1) (4)

- 3.17 Leune het vir Dou gesê wat die naam van die seun was wat haar gered het.

Gee 'n feit uit die verhaal om te motiveer waarom die stelling ONWAAR is. (1)

- 3.18 Waarom kan ons sê dat Dou reg opgetree het deur dadelik in die water te spring? (1)

- 3.19 Waarom was dit verkeerd dat Leune nie dadelik vir Dou van haar geheim vertel het nie? (1)
- 3.20 Waarom kan jy jammer voel vir Dou? (1)
- 3.21 Hoe help die skrywer die leser om die tema van liefde te verstaan? (1)
- 3.22 Kies die KORREKTE antwoord uit dié tussen hakies. Skryf net die vraagnommers (3.22.1 en 3.22.2) en die antwoord neer.
- Aan die einde van hierdie verhaal is die toon (3.22.1) (gelukkig/hartseer), want Dou en Leune het uitgevind dat Dou (3.22.2) (die rede is waarom Leune nog lewe/jaloers was op Leune se eerste liefde). (2)
- [40]**
- TOTAAL AFDELING B: 40**
- GROOTTOTAAL: 40**